

პრობლემები რჩება

თბილისი. “ლოკომოტივის” სტადიონი. 7 ივნისი.

“დინამო” (თბილისი) – “ჩერნომორეცი” (ოდესა) 1:0 (0:0).

“დინამო”: გოგია, ძოძუაშვილი, ჭელიძე, ებრალიძე, მუჯირი (წერეთელი), გავაშელი, ქორიძე, ხიზანიშვილი, დარასელია (კოპალეიშვილი), მ. მაჩაიძე, ყიფიანი.

“ჩერნომორეცი”: დეგტიაროვი, ნეჩაევი, ლემჩუკი, პოლიშჩუკი, რიბაკი, ფეილმანი, საპოჟნიკოვი, უსტიმჩიკი, ალიზადე, დორომენკო, დავიდოვი (გრიგორიევი).

მსაჯი: ი. სამუსენკოვი (მოსკოვი).

მინდვრიდან გაძევებულია ვ. ფეილმანი, გაფრთხილებები მიიღეს რ. ალი–ზადემ და დ. ყიფიანმა.

გამარჯვების ფაქტი თავისთავად სასიხარულოა. ეს რომ არა, ჩვენი გუნდის მდგომარეობა სატურნირო ცხრილში უკიდურესად მძიმე იყო, მაგრამ მართლაც ცალკეული გამარჯვებებით, ამა თუ იმ მატჩის მოგებით არ წყდება ის რთული პრობლემები, რომლებიც ჯერ კიდევ საკმარისადაა დინამოელთა თამაშში. მით უმეტეს, რომ მათ ახლა ორი მატჩი აქვთ სტუმრად და შინ მხოლოდ თვის ბოლოს თამაშობენ.

პირველი, რაც თვალში გვხვდება, ისაა, რომ თბილისელთა თავდასხმის თამაშში ძალიან ნაკლებია აგრესიულობა. თუ მხედველობაში არ მივიღებთ რამდენიმე მომენტს, რაც მაჩაიძესა და ყიფიანს შეექმნათ, ოდესეღონა მეკარე დეგტიაროვს სანერვიულო დიდი არაფერი ჰქონია. ბურთის ზედმეტი ტარების გარდა, რაც ჩვენს ფეხბურთელებს სისტემად აქვთ ქცეული. მოკლე გადაცემები უახლოესი პარტნიორებისთვის, რომლებიც, როგორც წესი, მინდვრის სივანებზე სრულდება, მხოლოდ აფერხებს გუნდის წინ მოძრაობას, მონინალმდეგის კარზე უშუალო იერიშს, ხელ უწყობს მეტოქეს, რომ თავი დაიკვას აუჩქარებლად, მოთქმებულად. თითოეული გადაცემის, ყოველი მანევრის ფასი ახლა წამებითაა გამოთვლილი, დინამოელებს კი დრო რატომღაც არ ენანებათ და ერთობ უყაირათოდ, არარაცინონალურად ხარჯავენ მას. გრძელი პასი, თანამედროვე ფეხბურთის ეს ეფექტური იარაღი, გუნდის სამოქმედო არსენალიდან თითქმის მთლიანად ამოღებულია, ამიტომ მინიმუმამდე დასული მოულოდნელობის ელემენტი. აქა–იქ, შემთხვევიდან შემთხვევამდე თუ მიმართავს ასეთ გადაცემებს ყიფიანი, სხვები კი გრძელ გადაცემას ასრულებენ მხოლოდ საკუთარ ნახევარზე და ისიც მინდვრის გასწვრივ.

“ჩერნომორეცს”, როგორც ეტყობა, ქულის აღება ჰქონდა გეგმად დასახული, რის გამოც დიდი ძალები ჰყავდა დაბანდებული მინდვრის შუაგულში და თავისი საჯარიმო მოედნის სიახლოვეს. საპასუხო კონტრშეტევებს გუნდი ახორციელებდა დორომენკოს, საპოჟნიკოვისა და ალი–ზადეს სწრაფი გარღვევების საშუალებით. სწორედ ასეთ ვითარებაში იყო საჭირო ბრძოლის გაშლა მთელს სივანებზე, გრძელი, ზუსტი პასები მოპირდაპირე მოთამაშეთა თავს ზემოთ. დინამოელებმა ეს არ გააკეთეს. თანაც, გაუგებარია, რატომ იხვევს ასე ღრმად მინდვრის შუაგულში, თითქმის თავის საჯარიმო მოედნამდე ყიფიანი, როცა მისი წინა ხაზზე ყოფნა აუცილებელ საჭიროებას წარმოადგენს.

მთელი პირველი ტაიმის განმავლობაში ვერ გავარკვიეთ, რა ტაქტიკური დავალება ჰქონდათ მუჯირს და ხიზანიშვილს, როცა ორივე ფაქტიურად ერთმანეთის

გვერდით თამაშობდა დაცვის მარცხენა ფლანგზე საპოუნუკოვისა და ალი-ზადეს წინააღმდეგ. პერსონალური დაცვის ასეთ მეთოდი, ჩვენი აზრით, ამ შემთხვევაში სრულიადაც არ იყო საჭირო. 5 მცველით თამაში შინ, ოდესის გუნდთან, არაა გამართლებული.

გვინდა შენიშვნა გამოვთქვათ მეკარე გოგის მიმართ. აღებულ ბურთს იგი მინდორზე აბრუნებს დიდი დაგვიანებით, ამასთან, იქვე უგდებს რომელიმე მცველს, მაშინ როცა საჭიროა მისი სწრაფი და შორი გადაცემა ღია პოზიციაში მყოფი თავისუფალი მოთამაშისკენ. ბურთის ზედმეტი გათამაშება მხოლოდ ამუხრუჭებს შეტევას.

კარგი შთაბეჭდილება დატოვა კოპალეიშვილმა. მან მეორე ტაიმში შეცვალა დარასელია, დიდხანს არ ყოფილა მინდორზე, მაგრამ უმაღლვე ჩაერთო თამაშში და გარკვეული სარგებლობა მოუტანა გუნდს. ეს მოწმობს, რომ ახალგაზრდა, პერსპექტიულ ფეხბურთელებს უფრო თამამად უნდა დაუეთმოდ ადგილი ძირითად შემადგენლობაში.

გოლი, რომელმაც “დინამოს” გამარჯვება მოუტანა, გავიდა მატჩის ბოლოს, 88-ე წუთზე, 11-მეტრიანით, როცა ოდესელმა მცველებმა უხეშად ითამაშეს კარის სიახლოვეს და ყიფიანმა ზუსტად დაარტყა. მაგრამ პენალტის დანიშვნა ი. სამუსენკოვს მანამდეც შეძლო, როცა კიდევ უფრო ნათელ სიტუაციაში წერეთლის წაქცევისთვის თავისუფალი დარტყმა (!) არჩია. საერთოდ, ი. სამუსენკოვი ამჯერად ვერ იდგა თავის სიმალლეზე, საშუალება მისცა ფეხბურთელებს უხეშად, არასპორტულად ეთამაშათ, დაერღვიათ წესი. ფეიდმანის გაძევება და გაფრთხილებები მხოლოდ ნაგვიანევი და აუცილებელი ზომები იყო, რისი თავიდან აცილებაც შეიძლებოდა საჭირო პრინციპულობის დროულად გამოჩენის შემთხვევაში.

რ. ქორიძე.

“ლელო”, 10 ივნისი, 1975 წ.